



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562
No. Fax : 03-8882 5569

PENGUATKUASAAN OPS KESAN 4.0 TANGANI KEUNTUNGAN MARGIN TIDAK MUNASABAH

Sejajar dengan pelaksanaan semakan kadar Cukai Jualan dan peluasan skop Cukai Perkhidmatan (SST), Kementerian Perdagangan Dalam Negeri dan Kos Sara Hidup (KPDN) telah melancarkan pelaksanaan OPS KESAN 4.0 berkuat kuasa pada tarikh yang sama iaitu bermula 1 Julai 2025.

Pelaksanaan operasi di seluruh negara ini adalah untuk memastikan para peniaga tidak mengambil kesempatan dengan membuat pergerakan harga sama ada tanpa asas mahupun melakukan pencatutan dengan menggunakan SST sebagai alasan.

Bagi skop penguatkuasaan, ia meliputi barangan dan perkhidmatan yang terlibat dalam semakan kadar cukai jualan dan peluasan SST yang berkaitan. Ini termasuk pemantauan terhadap barangan yang tidak terlibat dengan semakan kadar SST seperti barangan keperluan asas.

Selain itu, pemeriksaan di bawah OPS KESAN 4.0 ini adalah meliputi semua kategori perniagaan iaitu pengilang, pengimport, pemborong, pengedar dan peruncit. Pemeriksaan yang dijalankan hari ini adalah melibatkan pemborong barangan keperluan pengguna seperti barangan kering dan makanan dalam tin. Ia bertujuan untuk memastikan sama ada terdapat pergerakan harga barangan akibat pengenaan cukai oleh pembekal barangan iaitu pengilang atau pengimport ke atas barangan bercukai adalah teratur.

Sementara itu, tindakan susulan penguatkuasaan yang akan dilaksanakan terhadap sebarang maklumat pergerakan harga barang dan caj perkhidmatan akan melibatkan penelitian kepada empat elemen seperti berikut:

1. Senarai Barang dan Bentuk Perkhidmatan

Pergerakan harga barangan dan caj perkhidmatan tertakluk kepada senarai barangan dan perkhidmatan di bawah senarai semakan semula Cukai Jualan dan peluasan skop Cukai Perkhidmatan.

2. Senarai Perniagaan dan Syarikat Berdaftar

Pergerakan harga barangan dan caj perkhidmatan tertakluk kepada perniagaan dan syarikat yang melebihi nilai ambang (*threshold*) yang ditetapkan dan bertanggungjawab untuk berdaftar dengan Jabatan Kastam Diraja Malaysia (JKDM).

3. Tempoh Pergerakan Harga dan Caj

Sebarang pergerakan harga barangan dan caj perkhidmatan tertakluk kepada tempoh kuat kuasa pelaksanaan dasar baharu berkaitan SST.

4. Margin Pergerakan dan Pencatutan

Margin atau kadar pergerakan harga sesuatu barangan atau caj perkhidmatan tidak melibatkan elemen pencatutan dan tidak bertentangan Akta Kawalan Harga dan Antipencatutan (AKHAP) 2011.

Setiap perniagaan dan syarikat adalah dinasihati untuk mengambil kira kesemua empat elemen sebelum melakukan sebarang pergerakan harga barangan atau caj perkhidmatan. Untuk mengelakkan sebarang pelanggaran kepada kerangka perundangan berkaitan, semua pihak berkaitan adalah perlu membuat rujukan kepada Jabatan Kastam Diraja Malaysia (JKDM) berhubung polisi dan mekanisme pelaksanaan dasar baharu berkaitan SST. Manakala, rujukan boleh dibuat kepada Bahagian Penguat Kuasa KPDN untuk mendapatkan nasihat berkaitan prinsip asas dan mekanisme penentuan pencatutan.

Berdasarkan statistik bermula 1 Julai hingga 8 Julai 2025, sebanyak 375 premis melibatkan 1,698 *Stock Keeping Unit* (SKU) telah diperiksa oleh pasukan penguat kuasa KPDN di seluruh negara. Daripada jumlah itu, sebanyak 6 Notis Hadir di bawah Seksyen 21 Akta 723 telah dikeluarkan. Sebanyak 2 syarikat telah hadir dan bersetuju untuk menangguhkan kenaikan

harga serta mengekalkan harga sedia ada. Manakala 2 syarikat lain telah hadir dan memaklumkan bahawa pergerakan harga jualan adalah diselaraskan dengan pengenaan cukai jualan manakala 2 syarikat lain sedang dalam tindakan sesi libat urus.

Sepanjang tempoh pelaksanaan OPS KESAN sehingga 8 Julai 2025, terdapat 17 aduan yang direkodkan berkaitan OPS KESAN 4.0. Kesemua aduan ini masih dalam siasatan lanjut.

KPDN akan mengambil tindakan tegas sekiranya kenaikan harga yang tidak munasabah dilakukan dan tidak sejajar dengan perundangan pencatutan. Individu yang disabitkan kesalahan melakukan pencatutan boleh didenda sehingga RM100,000.00 atau tiga tahun penjara, atau kedua-duanya sekali. Manakala bagi syarikat, denda sehingga RM500,000.00 boleh dikenakan jika disabitkan kesalahan. KPDN juga terbuka untuk memberikan nasihat berkaitan prinsip asas dan mekanisme penentuan pencatutan bagi memastikan peniaga sentiasa peka dengan undang-undang yang sedang dikuatkuasakan.

Tindakan ini adalah sebahagian daripada inisiatif KITA GEMPUR yang telah dilancarkan pada 19 Oktober 2024 lalu dalam menangani isu manipulasi dalam aktiviti perniagaan. Justeru, orang ramai yang mempunyai maklumat berkaitan aktiviti manipulasi harga disarankan untuk menyalurkan aduan yang lengkap dan tepat melalui saluran berikut:

- i. Pusat Arahan Penguatkuasaan 03-8882 6245/6088;
- ii. WhatsApp 012-665 4292;
- iii. Portal e-Aduan KPDN iaitu <https://eaduan.kpdn.gov.my>;
- iv. Call Centre 1-800-886-800; dan
- v. Aplikasi Telefon Pintar Ez ADU KPDN.

TUAN SHAMSUL NIZAM BIN KHALIL

Timbalan Ketua Pengarah Penguat Kuasa (Operasi)
Kementerian Perdagangan Dalam Negeri
dan Kos Sara Hidup (KPDN)

Selangor
9 Julai 2025

